



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI
DREJTORIA E ÇËSHTJEVE PROCEDURALE, LIGJORE DHE MARRËDHENIEVE ME JASHTË

Nr. 64 Prot.

Tiranë, më 14 /11/ 2013

Lënda: Rekomandim për marrjen e masave për parandalimin dhe eliminimin e sjelljeve që çenojnë dinjitetin e individit për shkak të përkatësisë së tij etnike dhe trajtimin me efektivitet të denoncimeve të bëra nga qytetarët, pavarësisht nga përkatësia e tyre etnike.

Drejtuar: DREJTORISË SË POLICISË SË QARKUT LEZHË

LEZHË

I nderuar zoti Drejtor!

Komisioneri për Mbrojtjen nga Diskriminimi në përmbushje të qëllimit të ligjit nr. 10 221 datë 04.02.2010 “Për mbrojtjen nga diskriminimi” për të garantuar të drejtën e çdo personi për barazi përpara ligjit, mbrojtje të barabartë nga ligji dhe mbrojtje efektive nga diskriminimi dhe çdo formë sjellje që nxit diskriminimin dhe bazuar në kompetencën që i jepet në bazë të gërmës “F”, të pikës 1, të nenit 32, të këtij ligji, për të bërë rekomandime për çfarëdo lloj çështje që lidhet me diskriminimin, parashtron sa më poshtë vijon:

Institucioni i Komisionerit në bashkëpunim me Komitetin Shqiptar të Helsinkit (KShH), është duke realizuar ditë të hapura në disa bashki, në kuadër të projektit “Për mbrojtjen dhe promovimin e të drejtave të personave të diskriminuar”, të mbështetur financiarisht nga Zyra e Kooperacionit Zvicëran në Tiranë. Gjatë takimit në qytetin e Lezhës, Komisioneri dhe KShH kanë marrë një numër të lartë ankesash lidhur me sjelljen e punonjësve të policisë në këtë qytet, ndaj personave që i përkasin komunitetit rom dhe atij egjiptian.

Më konkretisht, shqetësimet kryesore të paraqitura nga qytetarët kanë patur të bëjnë me abuzime verbale nga ana e punonjësve të policisë ndaj qytetarëve, të cilët i përkasin komunitetit rom dhe egjiptian. Gjithashtu, në shqetësimet e ngritura nga ana e qytetarëve ka qënë mungesa e gadishmërisë ndaj denoncimeve apo thirrjeve të bëra nga qytetarët rom dhe egjiptian, ndërsa shprehen se ka një gadishmëri të punonjësve të policisë që të



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al

shoqërojnë vetëm individët që i përkasin komunitetit rom dhe egjiptian, në rastet kur ka një konflikt dypalësh.

Misioni i Policisë për ruajtjen e rendit dhe sigurisë publike, nuk mund të realizohet në rast se ajo me veprimet apo mosveprimet e saj shkel të drejtat dhe liritë e njeriut, e për më tepër kur sjelljet e punonjësit të policisë ndikohen nga përkatësia e qytetarit në një minoritet të caktuar. Policia ka përgjegjësi të mbrojtë individët nga rreziqe të mundshme, jetën e tyre, si dhe sigurinë dhe pronën e çdo individi, pavarësisht nga përkatësia e tyre etnike. Ushtrimi i përgjegjësive nga Policia dhe mbrojtja për qytetarët duhet të bëhet në përputhje me parimin e barazisë dhe mosdiskriminimit, parime këto që janë të përcaktuara në Kushtetutën e Republikës së Shqipërisë. Shkelja e parimit të barazisë dhe mbrojtja efektive nga çdo sjellje diskriminuese e policisë është e ndëshkueshme në bazë të ligjit nr. 10 221 datë 04.02.2010 "Për mbrojtjen nga diskriminimi", garant për zbatimin e të cilit është institucioni i Komisionerit për Mbrojtjen nga Diskriminimi.

Masat speciale që policia ka të drejtën të ndërmarrë në ushtrim të përgjegjësive të saj ligjore, si njoftimi për paraqitje në polici, shoqërimi në polici, nuk duhet të përdoren nga ana e punonjësve të policisë si mjet presioni ndaj individit, e aq më tepër pas sjelljeve abuzuese të fshihen motive diskriminuese.

Në çdo rast kur vërehen abuzime verbale ndaj individëve rom dhe egjiptianë, është e domosdoshme që sjellje të tilla të hetohen në mënyrë efektive nga ana e policisë dhe përgjegjësit të marrin ndërshekimin e duhur. Gjithashtu, përgjegjësit duhet të përgjigjen për çdo rast neglizhence dhe mungese gadishmërie të treguar ndaj thirrjeve apo denoncimeve të bëra nga individët që i përkasin komunitetit rom dhe atij egjiptian.

Kërkojmë nga ana Juaj, që në frymën e respektimit të ligjit dhe të drejtave e interesave të ligjshme të qytetarëve, bazuar në parimin e barazisë dhe pa u diskriminuar, të vlerësoni në mënyrë maksimale problemin dhe shqetësimet e ngritura nga pjestarët e komunitetit rom dhe atij egjiptian për abuzime verbale dhe mosreagim ndaj denoncimeve të tyre, nga ana e policisë.

Përsa më sipër, nisur nga situata e konstatuar, si dhe bazuar në kompetencat që neni 32 pika 1/"f" i ligjit "Për mbrojtjen nga diskriminimi" i jep institucionit të Komisionerit për Mbrojtjen nga Diskriminimi:

REKOMANDOJMË:

1. Drejtoria e Policisë së Qarkut Lezhë duhet të marrë masa për të hetuar dhe ndërshekuar çdo rast abuzimi verbal të bërë nga punonjësit e policisë së shtetit ndaj individëve për shkak të përkatësisë së tyre etnike.



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al

2. Drejtoria e Policisë së Qarkut Lezhë duhet të marrë masa për të trajtuar me efektivitet çdo thirrje apo denoncim të ardhur nga çdo individë, pavarësisht nga përkatësia e tij etnike.
3. Drejtoria e Policisë së Qarkut Lezhë duhet të marrë masa që thirrja e personave në polici, shoqërimi i personave në polici, dhe marrja e çdo mase tjetër speciale që parashikohet me ligj për të ruajtur rendin dhe sigurinë publike, të bëhet pa diskriminim dhe duke respektuar të drejtat dhe liritë e njeriut, dinjitetin e individëve.

Duke besuar në mirëkuptimin dhe bashkëpunimin tuaj.



Konc. Klodiana Jamberg



Adresa: Rruga Sami Frashri, Nr. 10, Kati II, Tiranë
(Tek godina e Fondit Shqiptar të Zhvillimit)
Tel: +355 4 2431078
Fax: +355 4 2431077
e-mail: info@kmd.al
web: www.kmd.al